

**Anwar berangan-angan jadi PM
Utusan Online
23 April, 2013**

PARIT 22 April - Walaupun belum ada kesepakatan dalam pakatan pembangkang mengenai siapa akan menjadi Perdana Menteri jika mereka menang pilihan raya umum kali ini, Datuk Seri Anwar Ibrahim sudah berangan-angan mengangkat sumpah memegang jawatan tersebut.

Malah, Ketua Pembangkang itu sudah mencipta skrip ucapan sebaik sahaja sah bergelar Perdana Menteri nanti.

"Mereka umum (kemenangan) lewat 2 pagi, jadi tidak boleh angkat sumpah sebab Yang di-Pertuan Agong sudah tidur, kena buat esoknya.

"Lepas (angkat sumpah) itu, TV3 dan RTM datang beratur nak temuramah. Saya kata pergi belakang dulu, kasi pengajaran sikit," katanya dalam ceramah yang dihadiri kira-kira 1,500 penyokong pembangkang di Kampung Teluk Sena, Lambor Kiri di sini malam tadi.

Seperti biasa, Anwar menggunakan pentas ceramah untuk menabur janji manis tanpa menjelaskan langsung mengenai kegagalan pakatan pembangkang mengotakan janji manifesto 2008 kepada rakyat Selangor.

Pada 12 Februari lalu, media melaporkan kenyataan Pengerusi DAP, Karpal Singh sekali lagi menegaskan Anwar akan menjadi Perdana Menteri jika pakatan pembangkang berjaya menawan Putrajaya dalam pilihan raya umum ini.

Penegasan itu dibuat oleh Karpal susulan wujudnya dakwaan kononnya Majlis Syura Ulama Pas menolak Anwar bagi menduduki jawatan berkenaan selain menganggapnya sebagai satu spekulasi.

Namun, semasa Muktamar Pas pada November tahun lalu, terdapat perwakilan termasuk daripada Dewan Ulama Pas, Hairun Nizam mencadangkan agar jawatan Perdana Menteri bagi pakatan pembangkang diberi kepada Presiden Pas, Datuk Seri Abdul Hadi Awang.

Menurut Hairun, ahli Pas tidak sepatutnya melobi pemimpin luar daripada Pas untuk mengisi jawatan tersebut selain menganggap Abdul Hadi merupakan calon yang sesuai.

Hakcipta Terpelihara © UTUSAN MELAYU (M) BERHAD

Source: : http://www.utusan.com.my/utusan/Pilihan_Raya/20130423/px_38/Anwar-berangan-angan-jadi-PM#ixzz2ZtaHnf6U

© Utusan Melayu (M) Bhd

